

四庫全書

集部

欽定四庫全書

集部

淡然軒集卷八

詳校官典籍臣潘奕雋

侍讀臣孫球覆勘

總校官知縣臣繆琪

校對官助教臣沈培

謄錄監生臣法炯

欽定四庫全書

淡然軒集卷八

明 余繼登 撰

詩

送邢小槐戶部

寒蟬吟落葉涼秋忽已徂
鴻鴈紛南飛游子懷故廬如
何我故人嚴裝方戒塗憶昔
結殷勤與子兩相於披心
見情懷慷慨意有餘何以喻
綢繆譬彼雙飛鳬天風起

蘋末同心而異趨一鳧厲羽翰翱翔向天隅一鳧悲其
羣翹首相嗚呼豈無盈樽酒遲予以須臾對之不能飲
涕下沾我裾會合知有時柰此音微疎千里若比鄰斯
言安得如願言加餐食努力恢良圖上以報天子下以
慰離居

獨酌

花下倒新篳明月來相對醉忘花影重却疑月影碎
壽米坤泉戶侯七十米二子伯舉武進士仲舉進

士

秦隴推名族燕京領飲非家貧緣愛客官薄為知機曠
達今誰竝壽年古亦稀仙郎文武彥榆景自光輝

壽少司徒王見峯公七十公原以終養家居者

葵藿原傾日桑榆轉慕親祇緣寸草意早乞老萊身靜
久忘簪紱情恬愛角巾朝端曾讓德閭里盡歸仁叅伯
誇難弟中丞有嗣人無營神自王不競性彌醇駿譽推
三達鶴齡始七旬莫言今白髮遂爾厭紅塵世事多新

態君王憶舊臣應知虛鼎席佇見下蒲輪致主心仍壯
匡時道益振東山高卧起曳履上星辰

瀛洲亭對雨

五月苦炎熱瀛洲亭亦然千林忽過雨雙溜看飛泉萍
翠無停梗荷珠不定圓新涼生坐席庭草盡堪憐

短歌送庶菴之狄道

少年與君友君氣薄青雲胸藏六甲術書著五千文壯
年慕君義與君結婚姻君志不得遂坎壈難具陳近日

共君醉燕市知君磊落猶如此晚拜一官狄道丞西去
鄉關數千里前年敵騎入臨洮殺氣慘淡陣雲高鬼火
磷磷遍原野至今談者猶魂銷惟君聞之氣轉豪壯懷
直欲凌雲霄請纓寧肯讓終子大將或恐非嫖姚送君
行飲君酒丈夫金印須懸肘馬頭皂蓋且輝光腰下吳
鉤正鳴吼飲君酒贈君詩一語一杯君莫辭金城迢迢
在何處日行日遠遙相思相思但望關山月猶似長安
對酒時

讀史二首

王孫昔未遇垂釣在江干腰下鹿盧劍夜夜衝星寒朝
受丞相知暮登大將壇壇上隆準公回席願交歡嗟哉
絳灌徒怒髮自衝冠拔城始授邑捕寇方拜官譬彼南
溟翼萬里振羽翰枋榆有斥鷃搶地但仰觀世事良若
斯志士空長嘆

公孫年六十猶是孝廉身射策偶見收遂為侍從臣主
愛詐亦忠赫赫侯平津長孺不解事區區論積薪淮陽

久不調壯志竟沉淪空令千載下為爾泪沾巾

哭泊陽王丈

六絕

君是當年王子喬忽乘鸞鶴上雲霄蓬壺自有神仙侶
空為英魂賦大招

湛湛清心玉不如姓名蚤已薦賢書可憐九待公車詔
依舊青衫未破除

與君偕計上燕臺裘馬縱橫亦壯哉君志未酬今已矣
壘簾獨奏不勝哀

樓成白玉白嵯峨欲借修文君柰何回首鄉園頻灑淚
故人零落已無多

恠君日日拚沉醉只愛沉酣不愛醒今日澆君君醉否
悲風吹雨晝冥冥

白馬青袍事事新君家兄弟更無倫那堪一夜西風惡
鴻鴈行中少二人

君仲弟先君數月卒

上巳日崔侍御招飲東郊同劉太常涉河游覽時

李太僕王給諫病不能從侍御索詩戲成二十

韻

三月天正和良辰當上已有客期修禊招攜幾知已連
轡出東郊頓覺異城市高亭何歸然磐石下礧礧野曠
天欲低雨過林如洗極目衆峯青入座羣芳紫林鳥驚
窺人睨睨良可喜春光倏強半好景能復幾當杯且莫
辭不見王與李感此三嘆息浮白更酌醴欲濟無方舟
肩輿涉河水水上敞高軒孤峙河之涘軒側聞流泉可
以漱醉齒何處送行人笙歌亂人耳行者君自行止者

吾仍止去住亦何常悲歡竟誰是游覽未終竟斜陽已
移晷策馬悵還歸高興殊未已停杯問主人何日重來
此

山中

遙望西山岑白雲日歸去驅馬向山中不見雲宿處

游荷花池

二絕

一雨過荷池池花嬌於女莫便輕折却或恐作人語
白鷺白於銀獨立池荷下風吹葉乍翻疑是弄珠者

贈用韞

以予送子意知子別予心
嘿嘿兩無語黃鸝鳴上林
數日不見君疑似經年別
忽道別經年相思渾欲結
行雲豈不駛何如車上輪
征輪已不見猶自望行塵
予歌皇華章子咏停雲
什問子來時期何似行時急

甘紫亭侍御買妾戲贈

二首

明珠買麗質光映使君家
試問閨中貌何如檻外花
無慚金是字偏稱玉為珈
寵極無人妬良宵自破瓜

才子近乘鸞深閨比合歡醉憐眉月映舞愛髻雲殘倦
倚鴛鴦枕嬌扶獬豸冠喜聞夫壻道昨夜夢徵蘭

魏見泉中丞寄詩見懷書此奉答

懷人西望隔天涯喜得緘書慰所思紙上韜鈴方叔畧

公寄有撫
晉事宜

扇頭珠玉惠連詩羨君指畫消烽燧顧我蹉

跼感歲時心事慚為知己道年來雙髻欲成絲

夏日病中得家信 二首

近得南來信園林已就荒有星猶是客無日不思鄉簷

樹夏偏茂茅軒午正涼何能生羽翼一枕卧羲皇

日日說歸去蹉跎直至今宦情諳始淡鄉思病逾深不
羨桓生馬寧須疏傳金一樽堪自適花下可長吟

許少薇奉常請告歸壽尊人賦贈

東陽有逸老雅尚在沉冥狂詠曾譏鳳貧帷每聚螢瓢
聲猶厭聒鼠味肯知腥憤發窮三傳謀貽但一經仙郎
真漢俊高步涉虞廷起草推長策伏蒲犯怒霆奉常酬
壯績朝宁仰儀刑豈敢薄鴻路其如戀鯉庭陳情頻抗

疏子告喜揚舠子以卿為月親看壽是星椿萱榮暮景
岡阜祝遐齡莖掌攜金露華筵倒玉瓶齊年俱鶴髮雙
杖竝鳩形誥下鸞新紫符來鳥自青循陔思久渴舞綵
意方寧菰米秋偏美蓴羹晚更馨君侯誇養志明主待
祈靈海內況多事能容愛獨醒

送鄭大夫晉明備兵川南

岷峨西南一片石巉巖久與人寰隔洛瀘滴洎萬仞流
嵐煙瘴雨紛相射漢家丞相曾廓清至今梟獍猶充斥

兩川幕府稱騎兵一夫裂眦爭脫幘驅逐大將如嬰兒
妖氛黯澹天無色縱橫漫說釜魚游跳梁尚懼莽蜂螫
滅寇虛言壯士規借籌還仗書生力大夫胸中富碩畫
司馬署中聲甚籍朝來受詔明光宮慷慨夕出長安陌
春明門外羅祖席大夫此行何赫奕腰下雕弧月一彎
袖中寶劍霜三尺馬蹄踏徧棧雲黃嶺猿啼徹江天白
虎符應令魑魅愁神羊坐使豺狼辟吁嗟乎巴人夷女
盈路側滿眼瘡痍盡蒼赤標柱休言漢將功理繩且效

龔生策何時刀劍易犢牛頓見干戈易麻麥

戲東劉効忠兵憲

當年意氣請長纓笑領銅符徼外行朔漠烽烟朝入塞
漢家都護夜談兵荒城日映旌旗色古戍風傳刁斗聲
回首空閨人寂寞流黃機上月華明

宮怨

屏帷向月夜窓幽坐對星河黯自愁獨有齊紈伴寂寞
涼風又到殿西頭

送甯雲田往荊州

青絲雙控五花驄
遙指荊南意氣雄
兩岸曉煙迷遠樹
片帆落日掛晴空
雲連吳會千山合
水入巴江一派通
君去正逢秋色好
仲宣樓在月明中

送丁勺原侍御左遷潞安司理

二首

樽酒論心日憐君
意氣賒一麾
辭漢闕五月向天涯
匹馬孤城暮荒村落
日斜賈生餘涕淚
空自灑長沙

春明門外路去去復盤桓
不是悲行役其如吾道難
風

塵雙客髻道路一征鞍獨有青龍缺時時馬上彈

題沈節婦卷侍御欽華大母也

矗矗山上石青青石上松托根既以異貞幹凌蒼穹不
隨春色榮肯隨秋風靡春去秋來自歲年年年勁節常
如此吁嗟乎沈母之操無乃是結髮事良人夙夜奉姑
嫜燦燦紅羅襦上結雙鴛鴦殷勤不惜理蘋藻此生自
分能偕老人事從來錯迕多連理摧殘何太蚤上有垂
白親下有呱呱子嗟哉夫子心九原應不死夫君死兮

何敢生夫心不死何敢死朝供菽水暮和九一旦紅顏
為君毀有兒作賦能凌雲自言持此報夫君平原未竟
生前志長吉忽修地下文獨撫遺孫心最苦指點遺經
泪如雨涼月娟娟照素幃嚴霜片片棲寒杼黃鵠歌成
倍慘然夜夜愁聞綠樹鶉幽谷倏回白日照墮書羸得
君王憐六十年前相永訣記得托孤言更切兒今有子
已高騫鵠立中朝稱俊傑多服歸來稱壽觴北堂大母
年方耄赭然顏上丹猶是盈盈雙眼血皦然心上冰飛

作蕭蕭雙鬢雪三春桃李競妍華後彫惟有貞松節吁
嗟乎石可泐松可折沈母之名不可滅

紀夢

萬歷丙戌六月初九日夢中所得句不知何
謂漫錄于此

相望潮水濶相思潮水深相思不相見愁殺望潮心

十月一日

滿天霜露下平蕪累累荒墳入望孤一陌紙錢空墮泪
寒衣知到九泉無

春日郊遊

連騎出郊甸，脩然林壑間。
開樽依綠樹，移坐對青山。
晴色當杯墮，孤雲與意閒。
塵襟聊自適，薄暮更忘還。

題費國聘市隱園

四首

避寵辭燕市，為園在漢陰。
剪茅旋結屋，種竹已成林。
泉石生幽興，琴樽愜隱心。
風塵吾愧汝，空自說知音。

大隱在城市，清幽獨羨君。
鑿池堪受月，架棟欲棲雲。
冠掛神羊影，身藏霧豹文。
偶諳心所好，不是為離羣。

幽意誰能識，閒門且自扃。
荒涼仲蔚圃，寂寞子雲亭。

爾心能遠因之地亦靈騷人時問字太史漫占星
十年甘澹泊三畝隔誰歎宦拙難招隱文成半解嘲才
名高漢署心事足衡茅前代稱禽向憐予獨繫匏

九日東用韞

為問梁園客其如佳節何繁花當戶好秋色向人多忽
動龍山興高吟藍水歌倘君能汗漫載酒欲相過

陸敬承有臺曰來爽暇日登之漫賦

四首

登君來爽臺直北見宮樹春條敷其華韡韡團朝露秋

風撼霜柯零落非其故
倏忽陰陽移榮悴
猶朝暮人命良若斯
胡為苦馳騫不如飲
君酒豁然抒情懷
志士愛修名達人貴
真趣

登君來爽臺東望平津
宅高門臨交衢
軒車填廣陌大命忽以徂
寥落非疇昔芳樹摧為薪
空庭惟鳥跡盛衰更何常
華豪竟奚益不如飲君酒
長歌浮大白世事難具陳
壯士腕空搥

登君來爽臺南望長安
道車馬何紛紛輦路無
宿草懷

壁意自銜彈缺食難飽名利無終極紅顏鬱枯槁攘攘
競歲時淒淒傷懷抱不如飲君酒與君共傾倒一醉空
百憂當生以為寶

登君來與臺西望西山岑飛泉流陰壑初日照陽林岩
棲者誰子容與山之潯蟬蛻遺世累放志獨高吟我欲
往從之雲谿阻且深不如飲君酒洗盞更復斟古人有
遺言金門堪陸沉

寄李汝培太僕

四首

悵別春明路忽驚歲月除龍門何日御鴈字近來踈慷
慨汲公疏寂寥楊子居巫咸憑借問天意竟何如

西去風塵惡南歸道路賒主恩憐太傅不遣到長沙江
上秋濤水瓊臺春日花知君能自適無夢到京華

自是天難問誰云官易工紅顏辭露冕白日卧秋風暫
跨揚州鶴聊閒鮑氏驄君身非阮籍肯復泣途窮

君已將身隱誰能為國謀投珠悲按劍積羽詫沉舟莫
嘆塞翁馬恐驚海上鷗難兄有令弟相對可忘憂

贈道士

玉皇香紫吏貌古帶煙霞世上應無住壺中別有家掃
松烹白石和露煮黃芽絕勝風塵客依依老歲華

楊公亮出叅閩藩歌以送之

楊公亮磊磊落落偉丈夫修眉大顙仍虎鬚一日千里
名家駒胸中奇字幾千卷片言落紙紛明珠三十挾策
上公車賦成咄咄凌子虛平明簪筆直金馬午夜燃藜
校石渠昂藏難入今人格骭墜不受時名趨自向人間

甘匏落懶從天上借吹嗟吁嗟楊生亦太迂生也工瑟
世好竽世人何賢生何愚漢庭誰復憐才子風塵直向
天一隅青絲雙挽白玉壺送君醉君三百觚酒酣慷慨
歌烏烏浮雲黯淡天模糊欲行且復留須臾勸君更勿
賦歸歟有舌尚存亦足矣有腰不折胡為乎男兒墮地
蓬桑弧南北東西惟所如况君有手龍可屠春霖一灑
七閩蘇流波不返白日徂容易白髮生頭顱試乘六傳
清炎海猶勝扁舟老鑑湖吁嗟乎若雌若黃何時無為

牛為馬從人呼安知此行非良圖豫章之材廊廟需竟
看還子承明廬

李夫人

魂耶夢耶迫而察之恍忽兮其不可即

近耶遠耶予實要汝奚徘徊其若疑

泣耶訴耶胡不前令予心其轉悲

休洗紅

休洗紅洗紅紅不鮮休棄妾棄妾堪憐妾命薄如水

嫁得游俠子游子夜夜游不歸賤妾獨上流黃機織成
袿服與郎着殷勤願得郎心樂郎心不樂妾安託

長歌行

舞腰細歌聲長調緩聞激羽音飛繞畫梁玳瑁席翡翠
妝斗轉銀河樂未央

短歌行

洗太白歌短歌歌短調更促樂極哀轉多白日暮朱顏
皤曦輪不迴君柰何

送蕭以台使秦兼歸省

君家仲氏昔校文躡履曾凌華嶽雲華山道士久雲卧
月明彷彿挹清芬君今持節秦中去此去經行華嶽路
白社原分大國茅青驄遙度長安樹華下王生心相知
燕市曾為華嶽期攜手應知能汗漫振衣寧復畏嶽巖
玉女盆頭香霧縹仙人掌上祥煙繞率律誰誇衆嶽雄
顧瞻頓覺三秦小羨君兄弟真壯游洞天福地足夷猶
應有新詩紀勝蹟風雨夜山靈愁金馬嗟予久寂寞

關門虛負王生約自憐斥鷃本卑棲何以大鵬游寥廓
太華削成勢獨尊諸峯羅列似兒孫遙望鄉關杳何在
漢江親舍白雲屯十丈蓮花如船藕昔日靈根今在否
君攜幾片為親壽令親壽比華山久

臨高臺

臨高臺高臺高嶽岑前臨大道俯瞰長林誰其築者千
黃金我來眺望惻焉傷心西不見樂毅南不見劇辛但
見浮雲蔽白日日華黯淡為之陰長空誰布雲為陣我

欲問天不可問怒拭寶劍拂塵埃劃然一呌陰雲開

送蕭桃源二首

君才寧一尉飄泊此微官為吏折腰苦逢人強項難誰
憐棘下駿真是棘中鸞別後桃源路春風走馬看

黃河天上至淮甸此浮沉怒浪羣峯小驚濤大壑陰此
行聊荷鍾漫道解鳴琴何日宣房曲長歌嗣漢音

午日夢公亮

自向樽前別纔于夢裏逢嗟君歸海嶠忽已屆天中舊

俗看懸艾浮生嘆轉蓬長安當今節惆悵憶揚雄

君馬黃

君馬黃臣馬青二馬交馳君馬停臣騎青馬間以驪逐
電橫行向安西為君臣呼韓破郅支斬樓蘭滅龜茲十年
踏遍陰山雪萬里歸來汗流血馬上將軍成大功閒飽
苜蓿嘶秋風

送張洪陽宗伯請告還公有閒雲館葢舊業也

首六

去住原無繫行藏意獨真乞身歸白社揮手謝紅塵濟

世慵為楫涉江聊采蘋秋風張翰興端不為鱸蓴

抱疴甘澗壑久客厭承明叢桂宜招隱滄浪好濯纓雲
光簷際落山色座中清何限雲山意堪輕世上名

世事何須問真心但不違閒雲如有約此日幸同歸薜
荔裁初服鳬鷖共釣磯故鄉風物好轉覺宦情微

選勝章江側聊開仲蔚園煙籠南浦樹日永北堂萱倚
檻風生戶當樽月滿軒幽期誰與共野老共忘言

直氣千秋壯高風百世師此行真獨往何日是前期蘿

逕堪龍卧梧岡想鳳儀莫將報國志容易逐年衰
世買燕王駿公焚學士魚物情今若此天意竟何如歲
月青陽逝年華白髮踈空令芸閣吏寂寞賦閒居

陳肖平擢守大名且得長孫短言贈行兼以志喜

二首

邢臺今輔郡此去況專城人望使君至當如澶水清何
心縈紫綬雅志在蒼生肯讓循良傳獨高漢吏名

為郡恩光重充閭樂事繁人方思杜母君喜抱蘭孫五

馬原稱駿一毛亦是鷄于公有德政應大里中門

題栢溪沈翁畫竹大宗伯龍江公尊人也

娟娟淇園竹青青歲寒後世上繁花豈不妍此君真與
栢為友栢溪老翁標格奇愛竹愛栢仍愛溪溪邊栢下
一壺酒醉墨寫出琅玕枝琅玕枝墨花落一竿兩竿勢
如削瀟灑團圞何太工神品不與凡竹同風雨一夜化
龍去隨翁直上蓬萊峯長留數莖化不得至今日日生
清風清宵明月當軒墮寒影逼人侵四座涼颼颼颼入

簾間隱几靜聽聲珊珊渭川千畝轉覺俗只此數竿看
亦足恠來宗伯徹骨清朝回對之豁心目尚書省近太
微垣天邊雨露滋靈根邇來生意潑潑發春深或恐長
龍孫

贈王四槐憲長

四首

北風烈烈聲怒號寒天滿目飛蓬蒿健兒皸瘃馬蝟毛
書生那有封侯骨都護休言出塞勞

歲暮陰雲黯欲奔黃沙漲天白日昏天關虎豹如雲屯

莫言長別辭金闕且喜生還入玉門

男兒出身常事邊何如歸種洛陽田寶刀卸却但高眠
且喜手中銀不律羞殺跨下鐵連錢

寒風吹折薊門柳勸君但盡杯中酒赤膽空言大如斗
向來枉費張君舌此去好閉陳生口

方擴甫至涿鹿聞貴陽之命不及一晤而去書此

道悵惘之懷

黔嶺盤江客路長君才豈合老風霜上書北闕忠為膽

驅馬南天瘴是鄉銅柱何時標粵地竹符此日走蠻王
相逢咫尺還相別離恨應隨到夜郎

奉送少司空李崇翁老師之金陵

四首

留都吳建業常伯古司空禮樂歸宗匠經綸屬國工
曉雲隨去馬秋月聽征鴻時有懷君夢清宵入漢宮

衆望歸台鼎王言作朕虞積薪嗟自漢乘傳且游吳
勝可探三島閒堪賦兩都秣陵餘王氣懷古見雄圖

去去辭金馬行行向石頭臺高曾宿鳳官古舊名鳩南

北皆榮遇江山足壯游獨令桃李士日夜望仙舟
昔校陪京士曾看吳苑花今叅玄武部還泛大江槎世
路疲行役風塵老歲華栖筠原重望日下看宣麻

送史應之給事使汴

二首

暫輟明光草遙分大國桐雙旌來日下四牡向天中寶
劍含秋水金函耀彩虹梁園如有賦枚叔未為工
去矣游何壯嵩壑本帝京河山千古勝帶礪萬年盟芳
草迷周澤祥雲擁汴城夷門久寂寞何處問侯生

送方戶部之金陵 二首

十月燕山道瀟瀟風正寒故人從此去偃蹇寄微官世
事憑誰論天涯好自寬相看惟涕泪聊爾勸加餐

官是度支吏人稱畫省郎此行非落莫吾道足徜徉地
勝當龍虎臺高有鳳凰知君能汗漫賦就莫相忘

費國聘入賀還蜀 二首

別久情偏洽歡多別轉難風塵堪墮泪霜露好加餐路
入蠶叢杳山當鳥道盤錦官千萬里何處望長安

吾黨論英妙惟君意氣雄入朝歌讌鎬獻壽競呼嵩名
以游燕大文從諭蜀工憐才明主意遲爾建章宮

重修乾清宮奉慈駕還御制題

閭闔重新接紫微九重天子奉慈闈雲連畫棟開金殿
日射雕楹敞玉扉仙鳥翩翩迎綵仗爐煙繚繞上霞衣
遙知定省承歡處壽曜弧南映曉輝

過燕子磯

燕子磯頭山色幽燕子磯前江水流磯上老僧無一事

年年此地看行舟

登鳳凰臺臺上有石甚奇前為陳光祿移去竟沉

江中

李白游白下曾為鳳臺吟鳳去幾千載臺名直至今我
來登此臺秋色亦已深高臺久荒涼古木尚陰森但對
驄馬客不聞彩鳳音游覽未終竟斜日下高岑好雨從
西來涼氣襲我襟臺上有奇石聞向江中沉利令石可
移惻焉感予心

恭題玄兔卷應制

玄霜搗就化仙姿躍躍今看在圃時喜向天門標上瑞
還從月窟應昌期精涵水德由來異色借煙光覺更奇
染素知逾千歲質披圖擬薦萬年枝

恭題大閱圖應制

我皇神聖能繩祖威靈赫奕超千古嶺表烽銷瀚海清
猶自憂危思耀武三月三日天氣和五雲高捧翠華過
地動轟雷奔鐵騎麗天晴日照金戈轅門此際軍威震

伐鼓鳴鉦聞遠近七校爭誇貔虎姿十千正演龍蛇陣
縱橫叱咤逞豪雄角射當場技盡工健兒慣使千斤弩
俠少能開六石弓健兒俠少紛馳逐夾道旁觀俱驚服
冠軍原不讓嫖姚扛鼎何須羨賁育桓桓赳赳壯皇威
妙畧英風播九圍久聞關塞饒歌唱坐見邊庭羽檄稀
太平日日謀桑土戰士人人沾雨露天下雖安未可忘
吾王一豫真為度只今將卒如雲屯禦敵年年更苦辛
九邊願普投醪惠萬載常歌挾纊仁

恭題畫鹿應制

匹練開仙籞良工賦象奇
牲牲看逸態麋麋見靈姿
太液泉明處長楊木茂時
試觀町疇迹知是戀恩私

玄圃深鍾瑞宜春舊擅名
異毫畱墨潤黝質照人明
飲滌形何適眠荃性不驚
宛然靈囿裏神物表休禎

曾見白環異仍畱寶繪傳
錫名徵百祿閱世已千年
華野娛嘉客蓬山伴列仙
銜花金令爽獻壽傍琳筵

本是仙家畜今歸冊府藏
冰紈呈寶籙星毳散瑤光
晴

樹紛供翠秋芝細吐芳上林無羽獵羣友任徜徉

送盧東麓祠部廷杖為民南還

燕山雪花大如手層冰欲裂陰風吼車輪挫折馬不前
盧郎此日東南走盧郎爾去莫銷魂爾力猶能叩天闔
幽谷不回白日照星辰亂落紅塵昏紅塵昏浮雲馳嗟
哉世事竟堪疑精誠自分山可移山鬼竊笑精靈窺漢
庭不聞賈生痛澤畔誰憐屈子悲盧郎盧郎爾何為上
帝待爾以不死爾歸且韜胸中奇慎勿狂歌嘆五噫

吳太華憲僉買燕姬赴蜀賦贈 二首

燕姬年十五弱質不勝春得侍吳郎寢何言宋氏隣舞
餘嬌欲盡粧罷態逾新行路應相問兒家疑姓秦
別母辭鄉國躊躇誰忍分愁看桃葉渡泪點石榴裙月
貌嬌夫婿風流屬使君若經巫峽路或恐化行雲

游崇真觀

偶來游玉宇不為覓金丹塵世紛拏苦人生休暇難聊
同羽客話暫卸侍臣冠石竇流泉出泠泠入座寒

有感

皇都色未曙車馬已喧聞俠客紛攜彈妖姬慣數錢王
侯羅甲第戚里鬪繁絃不似股肱郡蕭條絕暮煙

過江陵故宅

高門餘故宅荒逕但新蘿巷僻無車馬庭空散綺羅樹
殘微有葉池淺不生荷富貴皆塵土豪華那足多

病中

病多偏易懶獨坐漫躊躇即死不稱夭倘生真是餘一

身原自幻萬相總成虛何事拚微命依依老校書

長門怨

長門寂寂不勝春忍聽君恩處處新亦有黃金堪買賦
羞將寵愛託詞臣

村居

寂寞村齋裡春深日覺遲藥殘呼僕劇背倦倩兒捶戶
外鳥啼樹井邊犬護籬地幽無客至閒檢杜公詩

長信宮

可憐長信已春回總是無人花亦開莫道天街常寂寞
入簾猶喜燕飛來

聞蟬 二首

高槐遙借隔林青樹裏鳴蟬乍可聽記得年年當此日
一般流響過閒庭

午夜枝頭時飲露斜陽葉底慣吟風兒童最愛聲清切
愁殺悲秋白髮翁

自君之出矣

自君之出矣羅幔為誰熏忍見博山上蛛絲結網文

恭題百子圖應制

宮中多樂事百子競歡趨知是燕謀應欣看龍種殊人階下玉隊隊掌中珠共訝冰為骨還疑玉作膚嬌癡原不妬遊戲總堪娛約臂黃金串纏身錦繡襦螽斯徵瑞慶麟趾叶禎符長信渾無事閒聽歌鳳雛

壽徐封君翰檢端銘之父

憶昔年當齒齠時與君諸弟相遊嬉君時文章光陸離

凌雲有賦衆所奇投分未登孺子榻論交已受季方知
三十餘年疾如駛予髮種種已如此君今頭顱可知矣
聞君年開六袞餘骨格清奇鶴不如教兒已作鳳池客
攜室同向鹿門居君今不樂將安須春花發繁紅秋樽
湛芳綠鳩杖雙攜靈壽筇紫簫共度長生曲何必懷金
紆紫謁帝廬又何必求仙問道訪茅屋如此五年願亦
足

送高儀部謫中部令

聊沽燕市酒送子向延安南省名逾重西人膽欲寒一
鳴成斥馬百里暫棲鸞但保丹心在無嗟行路難

元夕送常廉菴北上

浮名驅子去慷慨向瑤京寶月照離思春星伴客程綠
樽聊共醉青眼定誰明自愧楊中侍無能薦長卿

送寧雲田備兵獨石

中朝節使行邊日猶是單于歟塞年劍氣夜寒青海月
笳聲秋斷赤城煙北門尺堠遙連晉上谷層關迥抱燕

聞說漢庭論保障黃金雀印待君懸

壽何封君

罷郡歸來二十年採芝劖藥老林泉斑衣亦是山中相
野服真成河上仙馴鶴時看陪杖履冥鴻久已破雲煙
嵩峯尚有王喬在明月應來證太玄

送易君選守兗州

驂驪寶馬逐風塵喜報除書歲歲新北闕雙符分紫綬
東方千騎擁朱輪人從水部知何遜帝為名邦借寇恂

有日黃金飛漢詔看君露冕自行春

望夷門 二絕

驅車上夷門懷古三嘆息可憐虛左賓獨有竊符策
朱亥誠勇士俠氣凌秋雲何事袖中椎不椎秦將軍

賦得雙塔寺

寶塔參差挿帝都琳宮對聳玉浮圖慈雲擁處輪疑轉
明月懸時影不孤白馬雙雙來異域黃金疊疊起靈樞
莫言久已成灰劫猶有胡僧夜拜膜

送徐肖及請告南還

去年我別君河橋樽酒醉斜曛今年君別我古道雙旌
紛婀娜歡會何少別離多把袂相看淚交墮君厭承明
廬翻然賦閒居歸雲一萬片片隨君車白雲親舍知
不遠游子天涯今始返十年曳裾亦已遲一旦抽簪未
為晚與君交結與君親仲氏吹簫伯氏墠羊膺笑我終
難達龍性知君不易馴長安華轂者誰子儘教繁盛常
如此豈無肝膽向人傾世路悠悠幾知己君嗤腐鼠腥

高步入青冥頓覺客游惡能使客心醒亦知富貴等朝
露可柰兄弟如晨星世間萬事無不了白日紅顏空自
老君辭榮祿何其早莖露調來甘旨清鞵蹣踏破雲林
曉送君行為君道君歸預把山石掃有日尋君易水濱
十日平原共傾倒

送慈谿潘學博

薄宦向何處東南甬水邊春風開絳帳寒色上青氈博
士原潘岳諸生得鄭虔廣文官舍靜明月好談玄

壽石介峯母太夫人時介峯新有操江之命

鳳誥翟禴出漢庭慈雲冉冉護輜輶金仙原註長生籙
寶婺今連執法星春色喜看萱草綠東風頻想荔枝青
中丞新領吳門節大有江魚薦醢醢

送許靜峯備兵清源

古人最明德今人惜離居離居豈不惜明德良足圖烈
風吹征衣送君城南隅君行向清源坐擁雙熊車清源
何壯哉交交名利途帆檣下大河車馬紛長衢厨傳日

豐盈田野日荒蕪昔予疲行役過此長太吁對食不能
餐單車屏前驅今豈異昔時民或益以瘡憲府自崇遽
安能顧田廬誰為灑春霖一使勞者蘇君負彩鳳姿況
握竹虎符行當念窮黎寧復甘華腴先哲有遺言示我
以良謨詩人戒戎作大易謹衣衲君行慎勉旃于以慰
區區

遇齋毅庵文所小飲敝居遇齋能談玄修賦贈

天涯宦跡許誰親且喜開樽對故人浮白尚餘年少興

談玄欲駐老來身須知塵世生原幻莫道丹經訣是真
今日與君聊盡醉仙家幾見有詞臣

劉効忠再起備兵陽和

不有唐馮在誰論魏尚功君才堪秉鉞此去復臨戎塵
淨龍城月煙消狐塞風亦知燕頷相未合老隆中

送張端叔大叅之大梁

四首

何意明光客驅車出薊門漢庭誰補闕梁地爾叅藩中
外皆王事風塵總聖恩寸心期不負此去更奚論

河橋三月暮春色曉氤氲黃鳥方求友青樽却送君魂
銷燕市酒心折太行雲兄弟飄零甚天涯忍更分

無以贈行役看君空泪垂向來惟令德此後但相思古
道存交誼深情悵別離連床風雨夜何日是前期

蒼茫望不極天上落黃河君向中原去應從此地過孤
身真浪跡九曲盡風波莫仗懷忠信艱危世路多

壽陳太常母夫人

青青堂上萱鬱鬱堂前桂萱兮正芬藍桂生何蔽蒔秋

風生桂枝馨香為國瑞托根在天墀雨露時其需雙承
雨露恩持以獻堂背雨露日以繁萱花日以蔚孤根比
大椿挺挺八千歲

朱太史養淳冊封周藩

昔予祇行役驅車向中原中原饑饉餘氛侵日以煩白
骨亂如麻黯然銷神魂朱門鬱蕭條哀哀諸王孫君今
復持節翩翩過夷門不知周遺民今有幾家存況今旱
為虐五月黃塵昏知君負經濟雅志念黎元當其授簡

時應為廢朝飧莫以董賈筆虛負鄒枚言願賡雲漢篇
歸來達至尊

元日飲用韞宅遇雪兼赴劉工部之約

四絕

子雲拙可嗤佳節甘蕭索喜得同心人相招共相樂
故人交如蘭故人酒為蕙交深酒更佳何妨為君醉
醉來興太狂六博閒笑語風雪解留人門外深幾許
踏雪覓劉郎相看成一笑不如王子猷空返剡溪櫂

寄友人魯生同原

四首

獨愛同原子昂藏一丈夫蚤遜博士籍急返步兵厨六
裹身方健百年事易徂鸛裘何用惜好付酒家胡
不受儒冠誤知君意頗真心能識故我名已讓他人謝
傳登山屐陶公漉酒中只今吾愧汝碌碌尚風塵

生事今何若棲遲林壑間有時或藥圃無日不禪關謀
任巢鳩拙身同野鶴閒已堪稱大隱何用覓商山

試問清狂興年來更有無花前曾索飲醉後更呼盧惟
我論文態從人說酒徒何時重把袂肯使社盟孤

鄒南臯給事之金陵 二首

萬里投荒後孤忠自許時君恩猶未報直道竟誰移諫
艸匡生疏封章賈傅詞倘能存國是敢惜此身危

牢落風塵裏艱危此一官薊門春色暮白下法星寒何
意時名大翻悲吾道難逐臣雙涕洟不為別離彈

壽俞進士父

六十龐眉叟雅如陳太丘閒情看畏壘生事獨滄洲自
是形疑鶴何須杖有鳩君家鄰海嶠歲歲自添籌

君有謝家玉新彈漢吏冠一經今若此百歲總為懽涉
履江天濶開樽雲水寬自應常駐世何事問還丹

寄教嘉猷

近得山中使遙傳錦字書云披萊子服肯問蔣生廬菽
水貧非病鶯花樂不虛安仁耽寂寞一意賦閒居

送黃層城先生還蜀李座師壻也二首

翩翩黃叔度瀟灑絕塵襟自是風流況兼之蘭蕙心標
清疑片玉價重愧雙金無奈別離急相思錦水深

君年方弱冠萬里事游燕去矣乘龍客飄然跨鳳旋壯
懷凌北冀歸興落西川別後如相憶春風待着鞭

送張伯任都諫閱視

開城古雍州漢家朝那地迢迢控番夷可斷匈奴臂一
從和議成關門久不閉無復念軍興祇聞增歲幣壯士
卧干戈邊城罷烽燧豈不息戰爭難免銷精銳藩籬不
復施邊人日窺伺去年戎馬來縱橫太凌厲酸風捲寒
雲三軍同日斃所過無雞豚哀哉肆吞噬天子頻西顧

疆吏盡更置君從掖垣中叩閣數言事刺刺悉邊情一
一當上意藉爾青瑣賢出作行邊使行視昔戰場白骨
尚委棄四野無人煙那能不隕涕誓將廓兵氛何以壯
軍勢君其賈餘勇時方待高議好上金城畧永垂秦川
利甘學汲公慙寧顧漢庭忌國論寄通塞仕途隨險易
得君借前籌庸公奏今歲

送王孝甫大理閱視延綏

二首

黃金裝寶劍白羽借兵符知爾多邊畧終能贊廟謨榆

關空築塞鐵騎不捐軀試問延州將嫖姚今有無
自昔成和議于今二十秋祇聞增市馬誰復問椎牛月
色臨關迥笳聲入暮愁君行看塞上何處有貔貅

何克齋侍御謫武昌

何君生人秀意氣本豪宕通達類賈誼伉直似劉向排
雲叩天闕一日章三上鳴馬輒見斥安得復立仗謫官
向三湘猶勝居一障君王自明聖小臣罪當放但願哀
無闕無令竈有煬自合走跋跋敢云心怏怏春日春明

門開建設祖帳武昌形勝地此行遊亦壯近聞饑饉餘
民物半凋喪君到若行春應為心悽愴監門圖流民茲
事誰能量志士總禁閹達人多慨慷直木忌先伐願君
慎所向

范太史冊封

承明使者漢仙郎金簡遙浮漢署香蘭社分茅開昨遠
蘿河如帶指盟長隴雲曉動旌旂色磧月宵生劍佩光
聞道邊庭資保障好將德意結賢王

顧實甫宮贊予告南還

五月下潞河輕帆渡淮水如何萼鱸思不待秋風起
勸君一杯酒聊以永今夕明日見雲停天涯望行跡
折柳聽啼鶯鶯聲坐來歇酒罷慄慄無歡孤舟向天末
君來何太遲君歸何太早祇恐再見君容易各衰老
相如慣消渴常此乞閒身好攜金掌露歸醉玉山春
解驂日已暮歸舟夜半昏舟中聞吳語疑是到閭門
豈不欲留君留君君不住翻羨檣上烏日得逐君去

君真無罣礙我自愧塵俗誓將結芒屨從君踏盤谷

田夫謠送馬瑞河父母之霑益

田夫無外事惟有佃其田腰鎌與荷鋤兩兩相比肩偶
爾理田器相攜向市廛忽聞城市言官長近已遷行當
舍我去不復久留連倉忙到縣門車馬已駢聞驚愕語
同輩茲事良已然自從官長來于今五六年年年納租
後家家飽粥饘雞犬夜不驚村舍常安眠積穀為我賑
逋賦為我蠲時有三老來化誨為我宣兒童各長成恩

德及惇痛信是田家樂賴得官長賢自謂長若斯閭里
得生全今去欲何之惆悵心若煎去從官長去不知何
時還來時不預料囊無送劉錢徒爾卧轅下相將車牽
牽聞說官長去行行向南滇滇南萬餘里道路太綿延
中復經巫峽嶮崎摩蒼天況當五月時赤日赫如燁田
夫有圓笠不敢獻君前但願加餐食以慰心拳拳尚來
福吾民勿此長棄捐僕夫早嚴駕五馬何翩翩雲樹隔
行蹤有淚如迸泉

送楊貞復宮洗請告南還貞復聞乃弟之變

十年強半卧林丘又向君王乞晝游
六月炎蒸愁客路一帆煙雨送行舟
鵲原夢斷悲青草離相吟成嘆白頭
萬里瞻雲情自切承明肯為故人留

魏懋忠開府晉中

當年直諫幾人存此日偏承明主恩
開府北來熊作軼大藩西去鴈為門
青萍曉拂霜金落赤羽朝飛檄正繁
千里塞垣歸保障一身多病更休論

婉兒怨戲為敬承作 八絕

粧成泣秋風含情泪如雨不信妖艷姿空房翻獨處
揮泪問新人雙蛾今幾許何事郎憐新新人能越語
新人能越語舊人能燕歌燕歌音調悲宛轉叶雲和
不惜玉交枝勸君金叵羅君恩別處新賤妾當如何
皎皎河漢側離離秋月影揚輝出海嶠流光照金井
捲簾望月色月斜知夜永夜月為誰明幽懷自耿耿
幽懷自耿耿愁思鬱不發長嘆倚屏帷坐見雙星沒

紅顏能幾時歲月去倏忽有寵莫令極寵極愛將歇

放歌

余雲衢汝亦堂堂七尺軀二十脫穎薦鄉書三十挾筴
上公車玉堂金馬此何地容汝久玷承明廬從汝執經
已三載天子不肯臨石渠吁嗟乎汝既無封侯骨拜相
鬚汝又不能投筆遠擊西月氏請纓生縛左單于漫言
虎可繡龍可屠屠龍繡虎竟何益況汝冥頑一技無逐
隊隨行成底事羞作昂藏一丈夫汝不見海上駝轅下

駒一旦受君牧與芻為君萬里爭馳驅少府金錢原膏
血太倉粟米煩徵輸念汝何功敢竊食十六年來真如
鼃如此素餐神所忌去夏一病幾長徂即今不死亦借
住鬢髮衰殘成朽株汝今不去將安需豈合中朝偶權
貴好歸田畔逐樵漁衛河之蒹茅可誅且營菟裘為汝
居貴何須誇趙孟富何須羨陶朱過眼富貴總石火從
今且自脫樊篴三家市裏堪沽酒五畝園中可荷鋤免
使短才污齒頰肯教烏帽笑頭顱諸公自是時稷契懶

人但放歌唐虞歸去乎歸去乎不然天厭人亦厭臨崖
勒馬將馬如

飲張質卿太僕宅和質卿韻 二首

七載君高卧頻年我夢思雲霄今再合樽酒得相隨故
態醉仍見深情恒不疑傳來白雪調非是四愁詩

百年能幾別一別動經時此會真當醉那能常若茲興
緣諸子發衰自二毛知慚愧賡高唱君言盡色絲

和教嘉猷雨中仍用質卿韻 二首

經旬雨不絕兀坐鬱愁思溜斷聲方歇雲來陣復隨
深容我懶天漏令人疑何事君高興揮毫猶賦詩
身衰逢亂日官冷是閒時行止今難定干戈復若茲壯
懷逐歲盡歸夢有誰知雨共窮愁泪瀟瀟擬散絲

和教嘉猷夜坐仍用質卿韻二首

暝色歸庭樹蟬聲逗客思澹雲行欲盡明月坐相隨
肉食慚何補珠投暗自疑君思無可報深愧素餐詩

炎蒸愁夏日獨愛夜涼時聞有閨風苑冷然當若茲閒

身孤鶴伴秋意草蟲知久坐生情思援琴理廢絲

夏日張質卿招飲有詩見示次韻奉答

故人良讌會懽樂愜素心所以衝炎熱連騎相追尋
滿斟不能辭感君情意深酒酣發雄談琅然金石音
人生有離合譬彼晴與陰會合不盡懽離後思難任

聞警

四首

烽火傳西夏干戈又早秋已聞百萬盡未解九重憂
戰血腥原草笳聲咽戍樓賈生餘涕泪獨向塞垣流

輸輓千羣至年年說餉師魂飛直北羽心折海東麾六
郡良家子三河俠少兒匆匆煩召募祈父亦何為

權總周連帥爵懸漢徹侯瘡痍猶未復征戰幾時休已
仗上方劍須臾回紇頭王師今老矣空抱杞人憂

天兵疲塞外敵騎滿秦中已歷夏秋月能無尺寸功前
軍誰破虜大將只和我何日妖星落捷書報漢宮

曾直卿教嘉猷張質卿馮用韞過小齋夜坐質卿

有詩見示次韻奉答

久雨清煩暑新涼入小齋偶然逢上客相與話幽懷酒
換東西市泥深前後街且堪留一醉談笑雜齊諧

教嘉猷以詩索飲次韻招之

君如時問字不憚往來頻斗酒家藏久園蔬市取新正
堪同醕酤無復嘆沉淪聚散吾生事那能長比隣

代敬承悲婉兒

日長命何促秋霜殞修嫿嫵婉方及辰幽明忽異路以
茲去倏忽翻恨來遲暮花落不重榮佳人難再遇亦知

粉黛姿原非金石固無奈死別離泉臺永不寤誰能召
冥魂一為話情愔獨立盼庭柯無言怨芳樹

袁太史封楚藩

為銜恩命出明光驛路迢迢向武昌禮樂共瞻周太史
聲名曾冠漢賢良楚筵酒設黃金縷郢曲吟成白雪章
何事錦雲隨地落乘流知欲賦瀟湘

教嘉猷以詩招飲次韻奉答

景物悲搖落涼風又報秋偶逢仙客召同散旅人愁綠

潑皆新釀白頭總舊遊殷勤莫惜醉明月在西樓

又次嘉猷韻

逢君不惜醉非是酒腸寬屈指憐吾黨晨星漸漸殘有
懷聊共適相憫且加餐追憶當年別能無此日懽

嘉猷賦得明月過齋頭次韻

以我相思渴對君懷抱傾十年惟此夜萬籟復秋聲况
有齋頭月照人冠上纓此時不共醉憂國浪如醒

七月七日八日敬承用韞招飲時敬承將有留院

之行同諸丈賦 二首

當日追懽處依然花滿亭只今惟七子河畔看雙星月
色浮樽白林光入座青興來渾欲醉誰忍獨為醒
秋風隨步屨樽酒日相親祇以離情惡翻令懽會頻暫
留惟促席不忍是征輪借問長江水何如天漢津

和用韞七夕 五絕

歲歲天孫此合懽月明雙照淚痕乾深情已自託雲雨
翻向靈禽借羽翰

秋淨雲霄冷絳河黃姑織女夜相過鵲橋渺渺平如掌
不似人間風浪多

露冷天高榆影秋纖纖新月上簾鉤無端雲漢看牛斗
添作深閨一夜愁

星橋雲擁彩鸞歸莫遣龍梭罷夜機聞道西征諸將士
秋風猶著舊時衣

斗轉天街夜漸深從他男女自穿針拙人懶乞人間巧
且向良宵醉二參

九日同魏懋忠馮用韞登顯靈宮玉皇閣 三首

祈靈漢帝有仙壇
閬苑秋陰碧殿寒
宦海幾人同對酒
天涯九日此憑欄
黃金臺向荒城沒
白玉珂從古陌看
回首紅塵悲莽蕩
紫雲深處欲騖鸞

瓊宮故是仙家地
佳節相招此共遊
古木蕭蕭松露冷
長空片片海雲秋
風塵忽老陶潛菊
樽酒聊登庾亮樓
秩散正宜同汗漫
何妨落日更淹留

玉皇高閣俯人寰
畫棟丹梯靜可攀
雙闕參差連漢殿

千峯迢遞接燕關樓頭秋色當杯墮檻外晴雲入座閒
松菊故園何處是蕭條三徑未能還

彭太史冊封便道歸省

駢駢四牡詠皇華河朔遙迤驛路賒已自西清分使節
還從南斗度仙槎金函啣鳳疑青鳥綵袖攜雲映紫霞
恠得高堂人並健彭年原自是君家

唐太史封鄭藩

青門柳色散晴烟太史風流擁節年恩詔曉從三殿出

使星高傍兩河懸
虎牢狐嶺開懷句
豹袖羔裘憶鄭賢
到處王侯應授簡
詩成不讓栢梁篇

七夕

新月依稀夜向闌
女牛此夕若為懽
人間謾道相逢易
天上猶然會合難
河水盈盈情脉脉
機聲軋軋露漙漙
可憐何限別離者
遙望仙橋掩淚看

送張質卿太僕二首

北風吹大陸
此去躡層冰
忽斷羣中鴈
其如棘上蠅
別

筵頻勸酒深夜共挑燈仕路從來惡崎嶇真可憎
驄馬經行處曾清海上氛人猶談往蹟名乃掛彈文心
事憑蒼昊閒情付白雲送君無限意聊與醉斜曛

劉柱翁雙壽

廿載人高大隱名鹿門紫氣映東瀛靈萱特並莊椿茂
玉樹雙聯竇桂榮伯氏南宮行曳履仲方北闕正持衡
金陵江鯉仙莖露併入瓊筵佐壽觥

陳南濱侍御奉母南還

浮雲西北馳越鳥東南飛壯士各有懷何為常依依況
有白髮親日夕望庭闈陳情叩天闕君恩許暫歸板輿
親扶將滿路生光輝到日啟華堂開燕及芳菲春風發
朱英照君舞時衣君良悅情意其奈心知違嗟我同門
友漸看雲會稀今復惜君別何以効涓微處士忌礲礲
願君聊息機珍重報國身努力奉春暉

送馮用韞學士歸省

君王方問道學士乃寧親綠野看雲近黃金結綬新更

緣瞻岵意得慰倚閭人
綵服皆宮錦猶餘漢苑春
壯年能解綬拜命即辭榮
盛事歸橋梓私心憶弟兄
傳符明主賜樽酒故人情
別後長安道應增鳴鴈聲

自與君為友知君真可師
亦慚非遠志謬欲託深期
握手忍分去停杯悵別離
無由生羽翼相望但相思

知君非久別無柰亦分違
從此風期阻漸看雲會稀
南鄰想高士東壁望餘暉
莫向碧山去依依戀舞衣

送王太初之金陵

匹馬西風出禁閭
皇恩新拜大鴻臚
有官何必中丞節
無地不堪君子居
南北那非明主賜
往來可柰故人疎
秣陵舊蹟時登眺
慷慨應傷六代餘

芝陽丈候補都門賦贈

孤臣來絕徼
久客滯長安
酒典鸛鵲服
塵生獬豸冠
途窮感慨易
金盡結交難
惟有匣中劍
西風洒泪彈

芝陽被謗後
撫臣疏其有功
于滇仍乞補滇
以酬其績
乃竟得鬱林
書此為別

淒涼傷歲暮飄泊又春初
裘敝因除目骨銷是謗書
莫緣臣節苦便與世情疏
迢遞蒼梧道新恩未可虛

壽蓋吏部母

高堂為壽日游子在京華
豈不榮鸞誥誰其侍鳳珈
見萱即憶母陟屺倍思家
遙望稱觴處白雲映紫霞

山行

初晴山路滑澗水正泠泠
秋老樹多紫雨餘巒倍青
參差高下寺迤邐短長亭
村酒不能醉寒風吹更醒

送王伯楨叅晉藩

世事真堪喙王生又外藩
浮沉原宦跡陟黜總君恩
霄漢天誰問風塵道自存
所憐白首別黯矣各銷魂

得續橋社長書寄贈二首

相離當歲晚相憶又秋初
聞鴈悲游宦懷人念索居
客情無復道清興近何如
自是嵇康懶年來音信疎
近得緘來信憐君生事閒
楸枰敲落月桐韻志高山
舊帖臨池補新詩閉戶刪
堪嗟為客者碌碌鬢毛斑

題江長信霧靈山圖

玄武之精化為石墮地幻作霧靈山去地不知幾千仞
巉巖砢絕人寰中有廣礪之水黑峪之關天為薊門
設屏蔽不令邊人飲馬于其間誰哉當關胡乃失守藁
厭人血谿量人首妖氛慘淡塞垣墟敵騎憑陵壯士走
一戰深慚正正旗三捷敢欺明明后西臺御史李汝培
鐵面皂囊何雄哉封書暮入明光殿戰地朝看驄馬來
江君故是埋輪者乘驄直抵關山下空壁蕭條餘釜鬻

藏尸縱橫遍野怒氣勃勃起神羊寒威凜凜入彈章
至今六月山頭雪猶是當年簡上霜於戲江君誰貌汝
豸冠繡服猛如虎只今東有倭西有虜潢池處處鳴桴
鼓願君攬轡一澄清掃盡欃槍報明主

贈唐憲副母夫人壽

君家慈親世難得白髮蕭蕭仍健食江鷗海鶴比精神
霞帔雲冠照顏色有子今為外臺臣黃金為帶朱為輪
已向虞廷稱萬壽還從孟母祝千春

送劉効忠巡撫延綏 四首

開府須人傑，維垣屬列卿。
符分竹虎去，軾擁畫熊行。
號令嚴刁斗，威名變旆旌。
羨君還自愧，白首竟儒生。

官是劉生拙，崇階亦漸躋。
廿年淹塞北，千騎向延西。
小范誰堪並，大名君與齊。
丈夫多遠畧，早晚破回奚。

誰云邊塞地，城郭近來空。
聞道延州將，猶稱列郡雄。
此行期破敵，慎勿但和戎。
好使麟臺上，書君第一功。

青油明虎帳，紫塞控龍庭。
漢馬嘶卿月，邊人識將星。
英

雄頭未白事業簡須青莫道書生老猶堪一勒銘

五十口號

二首

五十今朝是淒涼感歲時浮榮仗馬似生事蠹魚知老
覺年來甚病惟歸去宜主恩慚未報容易鬢成絲

初度逢搖落庭柯葉正飛歲華已不待心事復多違久
宦慚金馬應還理石磯生平何者是敢道去年非

逐婦行送陳從龍侍御

莫逐婦逐婦令婦悲試問婦何悲妾亦有所悲不緣實

悵閒鴛枕不愁艷質妬蛾眉妾有一寸丹日織五丈素
織作不辭勞何事君不顧君不顧兮妾無緣妾無緣兮
妾何言當初擬與同生死寧知棄擲今如此妾豈願學
隨風花妾豈願作覆盆水隨風花逐水流覆盆水不再
收妾意與君相綢繆何無何有為君求君不悟兮妾心
憂出君門沾妾臆欲行不行長嘆息莫言去婦無顏色
倘君尚欲當窻織應知去後能相憶

送常對水

二首

三十年前曾聚螢與君清夜坐談經蹉跎愧我頭先白
淩落看君綬始青此會且拚酩酊醉明朝何處短長亭
天涯朋舊憐星散厭對驪歌不忍聽

太原亦是先王地質樸猶餘太古風君去好攜循吏傳
政成寧讓晉陽公桑麻處處深山裏絃誦家家明月中
何日仙鳬飛漢室都人應避五花驄

甲午元日憶用韞

他日逢元日開樽我對君此時吾謝客翻恠爾離羣懶

醉長安酒空瞻海嶠雲弟兄寥落甚嗒矣坐宵分

王伯楨入都志喜

世間萬事難具陳伯楨乃作外臺臣仰天大笑去不顧
拋却金紫如埃塵吾輩亦是奇男子肯令行止由他人
世間萬事誰能保伯楨復走長安道囊中白簡久糝糊
腰下黃金尚美好光陰去去如流水六七年來復如是
當日英雄安在哉空令姓字汙人齒路人共指關西子
七尺骯髒猶如此春花正發玄都觀暮雲空鎖平津里

伯楨與君別來久窮交醉汝一杯酒胸中磊塊能澆否
陶令當年懶折腰陳生有日終開口飲君酒為君歌所
得漫言比仲多西夏豺狼雖授首北海魚龍未偃波中
原白骨莽相望赤子恐弄池潢戈丈夫報國須少壯問
君意氣今如何

戲東用韞

問君山中何者好君言無事常却掃朝看小婦理新粧
暮督侍兒尋舊草有時舞綵奉親懽頻沾餘瀝醉更闌

錦帳酣眠不覺曙何能清夢到長安

純之丈以予十六年官六品貽詩見笑次韻解嘲
官久成衰相官閒赴病身方慚趙氏璧敢嘆漢家薪愚
拙應輸我才名實讓人浮榮今已足有志在垂綸

壽譚中丞母

慈母九熊舊仙郎符虎新去持開府節歸慰倚門人榴
火當樽艷荷香入酒醇添籌從漢沔獻祝指峨岷早逐
潘家馭休回王子輪願將稱壽意散作錦江春

客有說子學禪者戲答

不語貝葉編且傾竹葉酒醉中有真趣真言吾何有

聞四槐丈至

纔憑尺素慰相思忽報輜軒已在茲握手乍看疑是夢
論心久語却成悲君才豈合長林壑此意聊將付酒卮
南北于今多戰伐即看明主問非麗

連日同四槐丈飲沈御史園有感

昨日看花花滿枝今朝花已半離披因憐聚散渾如此

始信衰榮亦若斯，令節正當三月候。相逢況是七年時，
共君痛飲不沉醉。即使重來未有期。

夜月同伯楨飲直卿宅兼訂會期

弟兄三十輩，今得幾人存。偶逐同卿騎，同傾學士樽。
人占星聚里，吾喜月當軒。此後經旬約，期君不負言。

題李納言萱庭日永卷

滄洲縹緲接青冥，中有仙家萱為庭。庭前一夜春風起，
春日曛曛照堦圮。森森萱葉何青蔥，裊裊萱花吐金紫。

共道此花應有神託根日與松芝隣松柯如石芝如菌
芝為顏色松為身可比崑崙老桃樹一度花開三千春

送莊太史冊封

楚客才名天下聞封茅直向粵南分千年帶礪歸宗子
萬里鶯花屬使君獨秀峯含桐葉色七星岩動劍鋒紋
壯遊處處堪乘興賦就應凌五嶺雲

寄王清泉刺史

故人多遠識早已宦情微林壑但寥落酒樽無是非心

輕五馬貴人羨一鴻歸子亦風塵倦秋來思振衣

五憶詩

魯應紹

應紹忘年友憐君老一經興酣時卜夜談劇每移星昔
詫玄言白今嗟墳草青望廬思笑語雙泪為君零

王公招

旅邸相逢日開樽尚自親誰知生別後遂作死離人疾
病工為祟文章竟誤身故園臺榭盡零落不勝春

常子仁

子仁吾黨彥雅志在公車詞賦金同擲丰標玉不如龍
年忽冉冉鶴夢竟遽遽幸有佳兒在猶能讀父書


克孝

吾宗老伯氏今世葛天民有酒即拚醉無財不厭貧可
憐泉壤下猶是孝廉身諸子近蕭索相看更愴神

克敬

最憐克敬弟戇直無它腸不戀儒為籍却耽酒是鄉醉

能消日月病乃入膏肓誰復為吾益思之倍慘傷



淡然軒集卷八